

Lu Sha Gam Ladaw Laban (5), April 4, 2022

Tsawra ai nu wa hpu nau ni,

Dai ni na kabu gara ai shiga hta, shut hpyit ai num sha langai a lam, dai num sha a shut lai wa sai prat hpe Madu Yesu sharai ya dat nna, kabu gara ai shiga sake hkam ai num sha langai byin tai wa ai lam hpe na la lu nga ga ai.

Wa Sarabyin Francis gaw, amyu shayi num ni, ahkaw ahkang lu la na lam ni hte seng nna, grai n gun dat galaw nga ai Wa sarabyin re. Shawng nnan na Christian ni hta, lak lai ai magam lit ni, galaw gun hpai lai wa ai amyu shayi num ni a lam ni hpe, Wa Sabyin chyahkring hkring tsun shadum lam galaw ai.

Nawku hpung a magam lam hta amyu shayi num ni a, lit lamang ahkyak ai lam hpe, loi tsun mayu ai.

Maria a lam hpe shawng sumru yu ga. Maria hpe “the Star of the Integral Evangelization” kabu gara ai shiga shachyam shabra lam a nhtoi shagan, ngu nna shamyng ai. Sasana shachyam shabra lam bai n gun dat galaw na matu, matsun shapraw ai, *Caritas in Veritate* ngu ai Wa Sarabyin Benedict XVI a matsun laika hta, ndai Nu Maria a amying shing teng hpe, Wa Sarabyin Benedict XVI kaw nna grai dam lada ai hku jai lang ai hpe mu lu ai. Adip arip di hkrum ai kaw nna lawt lu lam, shut hpyit ai prat kaw nna shinggyim masha ni lawt lu lam, ngu ai lam ni a lachyum hpe Nu Maria a mahkawn shakawn ga ni hta lachyum tsun shaleng da ya ai hpe mu lu nga ai.

Kabu gara ai shiga shachyam shabra lam hta, Nu Maria gaw kasi kamang re, matsan mayan re ai kun dinghku kaw nna rai nga ai zawn, amyu shayi num ni hpe manu shadan lam n nga ai laihtung masa hta nga lai wa ai jan mung rai nga ai. Raitim mung, dai zawn re ai masa hta n gun atsam nga ai hpe shi madun shapraw lai wa sai. Kabu gara ai shiga shachyam shabra lam hpe awng dang shangun ai gaw ja gumhpraw arawng aya ni nrail, masha tai wa nna anhte hte rau shanu nga ai “Mungga” she madung rai nga ai.

Amyu shayi num sha ni hpe, Madu Yesu ap jaw ya ai, sasana lit magam ni gaw mau hpa nan rai nga ai. Amyu shayi num ni gaw kasa ni hpe kabu gara ai shiga htawn shana ya ai kasa ni rai ma ai. Madu Yesu a hkye hkrang la ai magam bungli hta, shi a si ai kaw nna bai hkrung rawt wa ai lam gaw, ahkyak madung, tsaw dik htum mabyin aten rai nga ai. Ndai hkrung rawt ai lam hpe shawng nnan mu lu ai, ahkaw ahkang hpe, lu la lai wa ai jan gaw Maria Magdalena rai nga ai. Ndai kabu gara ai shiga hpe, Kasa ni hpe htawn tsun shana ya na, lit magam hpe ap ya hkrum ai jan gaw Maria Magdalena rai nga ai. Dai re majaw, shi gaw Kasa ni a Kasa re, nga nna San pra ai Thomas Aquinas tsun shakawn da nga ai.

Kabu gara ai shiga Chyum laika hta mu lu ai, laklai ai kaga num sha langai gaw, Madu Yesu hte hkrum shaga lai wa ai Samaritan num sha rai nga ai. Samaritan masha ni hte Yuda masha ni a lapran kanawn mazum lam nmai galaw ai, ngu ai lai htung masa hpe run kau ya ai, mare de wa nna Madu Yesu a lam mare ting hpe wa tsun shana ya lam galaw lai wa ai, hkyik hkam kaba dik ai sasana shachyam shabra lam galaw lai wa ai jan rai nga ai.

Madu Yesu a sasana hkrum lam hta shang lawm lai wa ai dan dawng ai kaga num sha ni law law mung naw nga nga ai. Kasa ni pyi hkrit nna hprawng yen mat wa ai aten ni hta, sadi dung let Madu Yesu a hpang hkan nang lai wa ai num sha ni law law nga nga ai. Ndai lam hpe Udang gawan ai sa ra 8 hta mu lu nga ai, shi Madu a hpang hkan nang nga ai num sha ni law law hpe Madu Yesu mu nna, “Yerusalem a num sha ni e, nye a matu hkum hkrap mi” nga nna shanhte hpe Madu Yesu shalan shabran ga tsun lai wa ai. Udang ntsa jen da hkrum nna, dik hkra nni nkri hkrum nga ai aten, shi Madu a Udang nhpang hta shi Madu hte rau nga nga ai ni mung, num sha ni rai ma ai.

- Anhte a Asia dan hta, sasana galaw nga ai amyu shayi num ni law law nga nga ai. **shamai shatsai ya ai sasana magam** hta shang lawm galaw nga ai amyu shayi nurses, doctors ni law law. Mama ni law law nga nga ai.
- **Manam daw manam hkalum ai sasana magam** hta shawng lawm nga ai amyu shayi num ni mung law law nga ai. Jam jau hkrum nga ai num sha ni hpe hkalum lakawn la lam galaw ai, grau nna dut hpaga galaw hkrum ai majaw htenza mat ai num sha ni a prat hpe bai gaw gap ya ai sasana lam ni hta shang lawm gun hpai nga ma ai.
- **Simsa lam, gaw gap ai sasana magam** hta shang lawm nga ai num sha ni mung law law nga nga ai. Lama na, anhte a Mungkan hpe amyu shayi num ni up hkan woi awn ai rai yang, majan ngu ai nnga na re, Ukraine majan zawn re ai ni n byin pru na re, nga nna tsun ai lam pyi nga nga ai. Majan mang hkan byin nga ai shara buga ni hkan, simsa lam nga wa hkra shawng de tsap nna, woi awn shakut nga ai Kahtawlik amyu shayi num sha ni law law nga nga ai.
- **Shinggyim bawng ring sasana magam** lam ni hta nga yang mung, amyu shayi num ni shawng lam hta tsap nna shang lawm nga ma ai.
- Tinang a asak aprat hpe ap nawng let, Madu Yesu a tsawra lam hpe sakse hkam nga ai, **Mama ni**, mungkan ting hta rai rai, sen 7 daram nga nga ai.

“Amyu shayi num ni nlawm ai nawku hpung gaw matsan mayan re ai nawku hpung re” nga nna Wa Sarabyin Francis tsun ai. Amyu shayi num ni a lit lamang, nawku hpung hta grai ahkyak ai lam hpe mung, Wa sarabyin Francis kaw nna chyahkring hkring tsun shadum lam galaw nga ai.

“Nanhte shada da tsawra nga mu; nanhte shada tsawra ai myit rawng nga myit yang gaw, nanhte nye a sape ni rai nga myit dai hpe, masha yawng mayawng chye lu na rai ma ai” nga nna Madu Yesu tsun sharin ai zawn, shawng nnan na Hkristian amyua shayi num sha ni, shanhte hta Mungkan arawng aya, law law nnga ma ai rai tim, Kabu gara ai shiga hpe, shanhte a asak aprat hte sakse hkam lai wa ma ai majaw, kam sham ai masha ni law law jat wa sai rai nga ai.

Asia dan a masha jahpan gaw, mungkan masha jahpan yawng a tsa hta shadang 54 jan rai nga ai. Dai daram masha law ai Asia dan hta, Christian masha gaw tsa hta shadang 2 jan daram sha nga nga ai. Madu Yesu du sa wa ai, shaning 2000 ning jan rai sai aten, hpa majaw Asia dan hta Christian masha ni nlaw, byin nga ai kun? Madu Yesu gaw Asia dan hta shangai paw pru ai rai nga ai. Dai re majaw Asia dan masha ni gaw Madu Yesu a prat hta Madu Yesu hpe nan mu mada nna, makam masham lu la ai ni rai ma ai.

Asia dan masha ni gaw, sharin shaga lam ni, tara lam ni hpe nrail, masha shada hku hkau ganawn mazup lam hpe madaw she grau manu shadan chye ai masha ni rai ma ai. Tsawra matsaan dum lama lam hpe manu shadan ai, tsawra daw jau lam galaw ai masha ni hpe hkungga tsawra manu shadan ai. Madu Yesu hkum nan mung, ru yak kyin dut hkrum nga ai masha ni hpe, galoi mung tsawra myit madun lai wa ai.

Wa Sarabyin Francis matsun shadum ai, Kabu gara ai shiga shachyam shabra lam galaw ai masha ni hta, nga ra ai atsam ning ja ni gaw:

- N gup aga hte galu galang hkaw tsun lam nrail, asak aprat hte sakse hkam nga pra ai;
- Tsun shaleng dan ai masa nrail, kaja wa ta tut Madu Yesu hte hkrum kadup lu hkra garum ya ai;
- Kabu gara shiga shachyam shabra lam galaw ai hta, kabu pyaw ai. Kabu gara ai shiga shachyam shabra ai masha ni a, myi man gaw, lup wa de nna bai wa ai myi man zawn nrail;
- Sharawng awng ai myit hte pru hkawm sa nna, machyi makaw hkala nba hkrum ai ni hpe gawn lajang ai, Sagu sama hte bai nhtang wa ai nawku hpung rai ra ai;
- A babysitter church, ma woi ai Nawku hpung nmai byin shangun ai nga nna Wa Sarabyin tsun ai. Sasana majen je lam galaw na n sharawng ai, nga nga sai hpung masha ni hpe chyu sha, lakawn nna nga mayu ai Jau ginwang ni hpe, A babysitter church, ma woi nna nga ai nawku hpung, ngu nna Wa sarabyin tsun shamyin ai;
- Sasana majen je lam galaw ai nawku hpung gaw, Madu Yesu hpe chye sai masha ni a lapran hta chyu sha, shanu nga ai masa n nre ai sha, de a shing gan

de pru hkawm sa ai; chyum laika hta na Zacchaeus, Nicodemus the Samaritan num sha ni zawn rai ra ai.

Asia dan hta sasana majen je lam awng dang na matu gaw, tinang hkaw tsun mayu ai masha ni hte hku hkau lam gaw gap la lu ra ai; Christian makam masham hpe, atik anang hpung masha shatai la mayu ai makam masham uhpung ngu ai masa, masha ni mu mada kau ya ma ai hpe shaning law law hkrum lai wa saga ai. Evangelical nawku hpung nkau mi a majaw mung rai na re.

Raitim mung, Vatican II a hpank kaw nna, Cahtolic nawku hpung a sasana majen je lam masa gaw, shinggyim masha yawng a atsam ni hpe hkungga manu shadan ya ai, shinggyim sari hpe hkungga manu shadan ya ai masa rai nga ai. Shinggyim masha ni a kabu gara ai lam ni gaw nawku hpung a kabu gara ai lam ni, shinggyim masha ni a myit ru myit tsang lam ni yawng gaw nawku hpung a myitru myit tsang lam ni re, ngu ai masa rai nga ai.

- Dai ni na aten, kabu gara ai shiga shachyam shabra lam ngu nna tsun ai shaloi, hpung masha shalaw la lam ngu ai masa sha nrai, dai hta grau dam lada ai masa mu mada chye na matu nawku hpung sharin shadum ya nga ai. Ndai lam ni hpe, *Evangelii Nuntiandi, Redemptoris Missio* ngu ai nawku hpung a matsun laika ni hta sharin matsun da ya nga ai. Sasana galaw ai ngu ai gaw, Wenyi lam, makam masham lam ni hpe sharawt ya ai magam lam ni sha nrai, shinggyim masha ni a hkum hkrang hte seng ai rawt jat bawng ring lam, sut masa rawt jat lam ni yawng lawm nga ai, ngu ai hpe nawku hpung a sharin matsun lam ni hta mu lu nga ai.
- Hkumzup ai sasana majen je lam ngu ai gaw, shinggyim masha yawng a hkumzup ai hkye hkrang la ai lam hte, lawt lu lam, ngu ai lachyum rai nga ai.

Ya dai ni ndai mungga hta, tang madun ai lam ni gaw, sasana majen je ai magam bungli hta chye da mai ai ahkyak ai lam ni nkau mi hpe sha, gam garan ya ai lam rai nga ai. Nawku hpung matsun sharin ya ai masa hte maren, nawku hpung a sasana magam bungli ni hta, kabu gara shang lawm gun hpai ai masha ni, tai nga hkra shakut nga ga law.

Homily by Cardinal Charsle Bo